

KHUTBAH JUMAAT

“KEBAIKAN DIAMALKAN, KESEJAHTERAAN HIDUP DINIKMATI”

(20 November 2020M/ 4 Rabiulakhir 1442H)

الْحَمْدُ لِلَّهِ، الْحَمْدُ لِلَّهِ عَلَى إِحْسَانِهِ، وَالشُّكْرُ لَهُ عَلَى تَوْفِيقِهِ
وَأَمْتِنَانِهِ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِشَأْنِهِ،
وَأَشْهَدُ أَنَّ سَيِّدَنَا وَنَبِيَّنَا مُحَمَّدًا عَبْدُهُ وَرَسُولُهُ الدَّاعِي إِلَى رِضْوَانِهِ.
اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ
وَإِخْوَانِهِ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ
مُسْلِمُونَ.

قَالَ اللَّهُ تَعَالَى فِي كِتَابِهِ الْعَزِيزِ :

وَقُلْ أَعْمَلُوا فَسَيَرَى اللَّهُ عَمَلَكُمْ وَرَسُولُهُ وَالْمُؤْمِنُونَ ^ص وَسَتُرَدُّونَ إِلَىٰ عِلْمِ
الْغَيْبِ وَالشَّهَادَةِ فَيُنَبِّئُكُمْ بِمَا كُنْتُمْ تَعْمَلُونَ ﴿١٠٥﴾

Maksudnya : Dan katakanlah (wahai Muhammad): Beramallah kamu (akan segala yang diperintahkan), maka Allah dan Rasul-Nya serta orang yang beriman akan melihat apa yang kamu kerjakan; dan kamu akan dikembalikan kepada (Allah) Yang Mengetahui perkara-perkara yang ghaib dan yang nyata, kemudian Ia menerangkan kepada kamu apa yang kamu telah kerjakan".

(Surah at-Taubah, ayat 105)

Kaum muslimin yang dirahmati Allah,

Marilah kita bersama-sama meningkatkan ketaqwaan kepada Allah *subhanahu wata'ala* dengan menunaikan segala perintah-Nya dan meninggalkan segala larangan-Nya. Semoga kita beroleh kejayaan, kebahagiaan dan keselamatan di dunia dan di akhirat. Marilah kita bersama-sama mendengar dan menghayati khutbah yang bertajuk : ***“Kebaikan Diamalkan, Kesejahteraan Hidup Dinikmati”***.

Kaum muslimin yang dirahmati Allah,

Allah *subhanahu wata'ala* telah menurunkan al-Quran yang mengandungi panduan untuk memperoleh kesejahteraan hidup di dunia dan di akhirat. Jika diteliti, sememangnya antara intipati ajaran Islam adalah mengenai kesejahteraan. Perkataan Islam itu sendiri bermakna kesejahteraan dan keselamatan. Oleh itu, tanpa kesejahteraan, manusia akan sentiasa dibelenggu dengan kerisauan dan ketakutan.

Syariat Islam bertindak sebagai sumber kehidupan yang teratur dan harmoni untuk mewujudkan asas-asas keselamatan dan kesejahteraan berlandaskan kepada memelihara lima perkara utama iaitu memelihara agama, nyawa, akal, harta dan keturunan. Jika syariat Islam ini diabaikan, pelbagai masalah dalam kehidupan harian, urusan negara, ekonomi dan sosial akan timbul dan menyebabkan Islam hanya tinggal pada nama sahaja.

Islam telah menunjukkan suatu kaedah yang boleh menjaga kesejahteraan iaitu kaedah al-Khair (kebaikan) dan at-Taqwa. Oleh kerana taqwa kepada Allah dan amalan-amalan kebaikan yang

dikerjakan seperti solat dan zakat yang ditunaikan pasti memberikan kejayaan kepada umat Islam.

Kejayaan ini termasuklah keamanan yang dinikmati sebagaimana firman Allah *subhanahu wata'ala* dalam Surah al-Hajj, ayat 77:

يَأْتِيهَا الَّذِينَ ءَامَنُوا أَرْكَعُوا وَاسْجُدُوا وَعَبُدُوا رَبَّكُمْ وَأَفْعَلُوا الْخَيْرَ
لَعَلَّكُمْ تُفْلِحُونَ ﴿٧٧﴾

Maksudnya: *Wahai orang yang beriman, rukuklah serta sujudlah (mengerjakan sembahyang), dan beribadatlah kepada Tuhan kamu (dengan mentauhidkan-Nya), serta kerjakanlah amal-amal kebajikan; supaya kamu berjaya (di dunia dan di akhirat).*

Firman Allah di dalam Surah al-Anbia', ayat 73 pula memberikan panduan kepada kita cara untuk mencapai kesejahteraan dalam kepimpinan.

وَجَعَلْنَاهُمْ أَيْمَةً يَهْتَدُونَ بِأَمْرِنَا وَأَوْحَيْنَا إِلَيْهِمْ فِعْلَ الْخَيْرَاتِ وَإِقَامَ الصَّلَاةِ
وَإِيتَاءَ الزَّكَاةِ وَكَانُوا لَنَا عَابِدِينَ ﴿٧٣﴾

Maksudnya: *Dan Kami jadikan mereka ketua-ketua ikutan, yang memimpin (manusia ke jalan yang benar) dengan perintah Kami, dan Kami wahyukan kepada mereka mengerjakan kebaikan, dan mendirikan sembahyang, serta memberi zakat; dan mereka pula sentiasa beribadat kepada Kami.*

Kaum muslimin yang dirahmati Allah,

Islam adalah agama yang menganjurkan kebaikan dan tidak menyuruh kepada keganasan atau ekstremis yang boleh merosakkan kehidupan manusia. Malah Islam menggesa umatnya untuk bermasyarakat seperti amalan solat berjemaah dan membantu yang susah ibarat sekawan lebah yang sama-sama membina sarang dari bahan-bahan sekitarnya dan sentiasa aktif di dalam proses pembinaannya. Ini bermakna amalan ibadah seperti solat, puasa, zakat dan haji yang ditunaikan bersama adalah satu proses pembinaan diri dan masyarakat ke arah kesejahteraan.

Umat yang sejahtera akan mampu menerajui bangsa lain ke arah kemajuan dan ketamadunan, seperti dalam ilmu sains, pendidikan, perubatan, ketenteraan dan sebagainya.

Islam tidak pernah menyekat kebebasan kepada umatnya dalam urusan-urusan kehidupan seperti mencari rezeki, berpolitik, berhibur, bersukan dan sebagainya. Malah sebaliknya diberikan kebebasan di dalam batas-batas yang ditentukan oleh Allah *subhanahu wata'ala*. Islam menyuruh kita mencari kebaikan dalam urusan-urusan ini untuk mencapai kepentingan umum dan diri sendiri tetapi dalam masa yang sama menolak segala unsur-unsur haram, penipuan dan kemungkaran. Ini kerana unsur-unsur ini boleh mengakibatkan kemudharatan diri, kemusnahan harta benda, kemunduran ekonomi dan kesengsaraan hidup yang akhirnya merosakkan masyarakat dan negara.

Al-Quran telah menceritakan bahawa manusia yang tiada amalan

taqwa dan kerja-kerja kebaikan, sebaliknya banyak dosa dan maksiat yang dilakukan, akan mengundang kepada kebinasaan dan kehancuran. Sebagai contoh, kaum Nabi Nuh tenggelam dalam banjir besar kerana menghina Nabi Nuh *alaihissalam*, kaum 'Ad yang mempunyai kepakaran membina bangunan telah dibinasakan oleh Allah dengan ribut angin sejuk lagi kencang selama 7 malam 8 hari kerana kemaksiatan mereka, kaum Tsamud pula binasa semua di kediaman masing-masing akibat gempa bumi yang dahsyat kerana perbuatan syirik mereka dan akhir sekali kaum Nabi Luth yang melakukan dosa liwat musnah dengan azab turunnya hujan batu kepada mereka.

Allah *subhanahu wata'ala* berfirman dalam Surah Hud, ayat 82 yang bermaksud:

"Maka apabila datang (masa pelaksanaan) perintah kami, kami jadikan kaum Lut itu diterbalikkan (tertimbus segala yang ada dimuka buminya) dan kami menghujannya dengan batu-batu dari tanah yang dibakar, menyimpannya bertalu-talu."

Allah *subhanahu wata'ala* menurunkan kesejahteraan dan keberkatan sebagaimana firman Allah, ayat 96, Surah al-A'raf yang bermaksud:

"Dan (Tuhan berfirman lagi): sekiranya penduduk negeri itu, beriman serta bertaqwa, tentulah Kami akan membuka kepada mereka (pintu pengurniaan) yang melimpah-limpah berkatnya, dari

langit dan bumi tetapi mereka dustakan, lalu kami seksa mereka lantaran apa yang mereka telah usahakan”.

Sesungguhnya, Islam amat menggalakkan umatnya agar memperbanyakkan amalan kebaikan yang memberikan faedah yang berpanjangan dan boleh dinikmati kita semua iaitu nikmat kesejahteraan. Negara sejahtera dan negeri berkat kerana amalan kebaikan penduduknya. Amalan kebaikan orang lain pun, kita dapat merasai kesan kebaikannya.

Kaum muslimin yang berbahagia,

Mengakhiri khutbah pada hari ini, dengari dan hayatilah pedoman dan panduan berikut:

1. Umat Islam hendaklah menyuburkan amalan kebaikan dan taqwa di dalam diri pada sepanjang masa.
2. Umat Islam hendaklah memahami bahawa kesejahteraan datang dengan sebab amalan kebaikan dan taqwa.
3. Umat Islam hendaklah menginsafi bahawa kemusnahan dan kebinasaan pula datang menimpa atas sebab perbuatan dosa dan kemungkaran.
4. Umat Islam hendaklah hormat-menghormati, tolong-menolong dan nasihat-menasihati dalam kebaikan dengan semangat persaudaraan Islam.

Akhirnya, marilah kita bersama-sama menghayati firman Allah *subhanahu wata'ala* dalam Surah at-Taubah, ayat 71:

أَعُوذُ بِاللَّهِ مِنَ الشَّيْطَانِ الرَّجِيمِ

وَالْمُؤْمِنُونَ وَالْمُؤْمِنَاتُ بَعْضُهُمْ أَوْلِيَاءُ بَعْضٍ يَأْمُرُونَ بِالْمَعْرُوفِ وَيَنْهَوْنَ
عَنِ الْمُنْكَرِ وَيُقِيمُونَ الصَّلَاةَ وَيُؤْتُونَ الزَّكَاةَ وَيُطِيعُونَ اللَّهَ وَرَسُولَهُ
أُولَئِكَ سَيَرْحَمُهُمُ اللَّهُ إِنَّ اللَّهَ عَزِيزٌ حَكِيمٌ ﴿٧١﴾

Maksudnya: Dan orang yang beriman, lelaki dan perempuan, setengahnya menjadi penolong bagi setengahnya yang lain; mereka menyuruh berbuat kebaikan, dan melarang daripada berbuat kejahatan; dan mereka mendirikan sembahyang dan memberi zakat, serta taat kepada Allah dan Rasul-Nya. Mereka itu akan diberi rahmat oleh Allah; sesungguhnya Allah Maha Kuasa, lagi Maha Bijaksana.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ
الْعَلِيمُ. أَقُولُ قَوْلِي هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ
الْغَفُورُ الرَّحِيمُ.

KHUTBAH JUMAAT KEDUA

الْحَمْدُ لِلَّهِ. الْحَمْدُ لِلَّهِ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ
وَخَدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ
صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا
بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ لَعَلَّكُمْ تُفْلِحُونَ. قَالَ اللَّهُ
تَعَالَى:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ
وَسَلِّمُوا تَسْلِيمًا

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ
مِنْهُمْ وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ يَا قَاضِيَ
الْحَاجَاتِ.

Ya Allah, ampunilah dosa-dosa dan kesalahan kami, ibubapa kami, ahli keluarga dan guru-guru kami. Limpahkanlah kesejahteraan, kedamaian dan kebahagiaan kepada kami semua dalam kehidupan di dunia dan di akhirat.

Ya Allah ! Ya Rahman ! Ya Rahim! Berikanlah taufiq dan hidayat-Mu kepada kami semua dan juga kepada pemimpin-pemimpin Negara kami, khasnya kepada Seri Paduka Baginda Yang di-Pertuan Agong Malaysia, dan juga pemimpin-pemimpin negeri

kami, khususnya Tuan Yang Terutama Yang di-Pertua Negeri Sarawak.

Ya Allah, Ya Dzal Jalali Wal Ikram! Kabulkanlah doa kami. Terimalah segala amal ibadah dan ketaatan kami kepada-Mu. Ya Allah, limpahkanlah ke atas kami nikmat kesihatan dan keafiatan, kurniakanlah kesembuhan kepada mereka yang diuji dengan penyakit-penyakit dan bebaskanlah negara kami daripada segala perkara yang tidak diingini dan wabak penyakit, khususnya wabak COVID 19. Menangkanlah kami dalam memerangnya.

رَبَّنَا أُنْتَنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. أَمِينَ،
أَمِينَ يَا رَبَّ الْعَالَمِينَ.

عِبَادَ اللَّهِ. إِنَّ اللَّهَ يَأْمُرُ بِالْعَدْلِ وَالْإِحْسَانِ. وَإِيتَاءِ ذِي الْقُرْبَىٰ وَيَنْهَىٰ
عَنِ الْفَحْشَاءِ وَالْمُنْكَرِ وَالْبَغْيِ. يَعِظُكُمْ لَعَلَّكُمْ تَذَكَّرُونَ. فَادْكُرُوا اللَّهَ
الْعَظِيمَ يَذْكُرْكُمْ. وَاشْكُرُوهُ عَلَىٰ نِعْمِهِ يَزِدْكُمْ. وَاسْأَلُوهُ مِنْ فَضْلِهِ
يُعْطِكُمْ. وَلَذِكْرُ اللَّهِ أَكْبَرُ. وَاللَّهُ يَعْلَمُ مَا تَصْنَعُونَ. أَقِيمُوا الصَّلَاةَ.